



Communicaziun a las medias

7avel Top Pop Rumantsch - il mund dir e fin dals AndaRojo

Cuir, ils 2 da november 2006 - Suenters ina pausetta da stad è la retscha da Top Pop Rumantsch puspè enavos sin il palc. Ed er questa giada cun in'ivetta musicala tut speziala. La setavla ediziun da quest project ambizius dal Radio Rumantsch è deditgada a la grupp da rock AndaRojo. La preschentaziun da ses toc «Muond in mai» coincide cun la partenza da la band per in «viadi da studi» en l'America latina.

Il mund musical dals AndaRojo sa preschenta detg dir ed offensiv. Uschia tuna er lur chanzun «Muond in mai», registrada per Top Pop Rumantsch. Ella reflectescha ultra da quai il spiert democratic da la giuvna grupp grischuna; il toc è naschì dad in «jam», vul dir dad ina improvisaziun spontana en il tschaler d'emprova al Bogn Ragaz. Chantadur Roland Vögtli, il nuscheigl rumantsch da la band, ha lura agiuntà in text adequat, adressà principalmain als numerus fans dals Rojos: «En noss concerts emprendin nus ad enconuscher fitg blera glied e tuts avessan gugent anc dapli da nus, e quai ma renda mintgatant trist». L'appel da reunir «frars e sours, baps e mammas» ad ina famiglia armoniusa, è da fatg ina pitschna bella expressiun da tendresse giuvenila, che cuntrastescha a la direzza musicala dal refrain. A la fin stat il giudizi filosofic ch'il mund ston'ins mintgamai cumenzar a midar tar sasez. Roland: «Pir cur ch'jau sun mez cuntent poss jau cuntentar vus auters».

Musica e cumposiziun: AndaRojo (Roland Vögtli, chant e gitarra; Johi Rauber, orgel e chant; Andi Meerstetter, bass; Hans Conzett, batteria).

Text: Roland Vögtli

Producziun: Manfred Zazzi

Maschaida: Dan Suter

AndaRojo (andaroho): La grupp da rock è naschida l'avrigl 2005, unind quatter musicists da diversas entgarnas geograficas. Ghitarrist Roland Vögtli è oriund da Scuol, organist Johi Rauber abitescha a Bravuogn, bassist Andy Meerstetter stat a Cuir e batterist Hans Conzett ha ses tschaler a Ragaz. L'emprim concert ha la band absolvì l'atun 2005; dapi là demussan ils AndaRojo ina preschientscha sorprendenta sin tribunas entaifer ed ordaifer il Grischun, augmentond viapli la cuminanza da fans. Il num da la grupp è be apparentamain spagnol – en vardad sa constituescha el dals prenums dals singuls commembers. L'affinitad al mund spagnol è però dada: l'emprim november 2006 partan ils quatter per in lung viadi en l'America latina – cun la finamira d'aprofundar e perfecziunar lur musica.

MUOND IN MAI

Eu less ris-char
da scriver quista chanzun
eu less scriver
alch per minchün.

Per minchün da vo
chi sun gnü quista saira
per mincha sour
e per mincha frar, per mincha frar.

Eu nu poss müdar il muond
eu poss be müdar il muond in mai
eu nu poss müdar a tai
eu at poss be accumpagnar
e sezzer cun tai vi dal fö
e tadar e laschar arder
eu nu poss müdar il muond
eu poss be müdar il muond in mai.

Eu less ris-char
da chantar quista chanzun
eu less chantar da tuot cour
e quai per minchün.

Per mincha uffant
pels baps e las mammas
lain esser famiglia
hoz nun es ingün sulet, ningün sulet!

Eu nu poss müdar il muond
eu poss be müdar il muond in mai
eu nu poss müdar a tai
eu at poss be accumpagnar
e sezzer cun tai vi dal fö
e tadlar e laschar arder
eu nu poss müdar il muond
eu poss be müdar il muond in mai.

Top Pop Rumantsch vegn era en l'avegnir ad esser in label per purschidas
innovativas ed unicas en il program da musica da RR. Per l'onn 2006 èn planisadas
ulteriuras producziuns.

Per ulteriuras infurmaziuns:

Jachen Prevost, manader redacziun da musica RR, tel. 081 255 75 75,
jachen.prevost@rtr.ch